

Augsburg, 2. September 1575

An Johannes Thomas Freige d. Ä.

Druck: Ramus, Professio regia, Basel 1576, fol. 2r.

HIERONYMVS VVOLFIVS IOANNI  
THOMAE FREIGIO, S.

Cum superiore mense in P[etri] Rami nostri lucubrationes Oratorias et Vitam eius, abs te φιλαλήθως, καὶ φίλοσόφως, καὶ δὴ, καὶ ῥερητορευμένως descriptam incidisem: uir clarissime, et propter philosophicum ingenium (quae his temporibus perpaucā sunt) mihi charissime: epistolam P[etri] Rami annis ab hinc compluribus ad Rhaeticum scriptam, abs te desiderari animaduerti, ac uix tandem à D. Achille Gassero repartam et utcunque descriptam, ad te mitto: qua tu tuo arbitratu utaris. Vtinam uerò talem Astronomiam ἀνυπόθετον καὶ ἀφάνταστον haberemus. Sed quia de ea ratione Tycho et (!) Bracheus sentiat, margini asscripsi: iudicium Schreckenfuchsij piae memoriae, socii tui, te percepisse existimo. Qui desperent, uideo esse multos: ego (quod non sine pudore et dolore confiteor) ἀγεωμέτρητος ὅν, in sententijs artificum, inter se non consentientium, cogor acquiescere. Quid acquiescere dico? μᾶλλον δὲ ἐπέχειν καὶ διασκέπτεσθαι καὶ μηδὲν λαβὼν, μηδὲν κρατῆσαι. Si quid tamen aliquando certi fuerit: posteritati foelicitatem eam gratulabor.

Τὸν ἐμὸν μὲν αὐτοῦ τοῦ ταλαιπώρου σχεδὸν

”Ηδη νομίζων ἐκτετοξεύσθαι βίον.

Tu uero et aetate, et ingenio, et eruditione, et eloquentia, et (quod maximum est et rarissimum nostra aetate) sano iudicio rectaque uoluntate praeditus, succedes in eorum locum, qui hactenus Graecam et Latinam elegantiam, omnemque liberalem doctrinam (qui quidem paucissimi supersunt) defendes: eaque re et munus Reip[ublicae] literariae maximè necessarium et utilissimum conferes: et immortalem ipse gloriam consequeris. Vale Augustae Vindelicorum, postridie Cal[endas] Septemb[ris] Anno 1575.

Boni consule, quaeso, lituras et κακογραφίαν pueri mei,  
οὕπω ἔξησκημένου, ὡς δέον.

Hieronymus VVolfius, μετ' ἐκτομὴν λίθου ἐκκαιδεκαδράχμου  
μόλις ἀναβιοὺς, καὶ (καθ' ὅμηρον εἰπεῖν) ἔτι ὀλιγοπελέων.